



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim

tiryimiyim@aolima

tir yimiyim

TAPAK 3



Ghani tir inyak tashi Taliban-ken o mejembitsü: PM Khan

Tripura Police-i TMC lenir Abhishek Banerjee anema ken o benok



VOL. XVIII NO. 300 (ADOK 300) DIMAPUR

ROGONÜ (FRIDAY)

LUROI (AUGUST) 13, 2021

₹ 5.00

State nem FY 2021-22 atema PDRD Grand sen crore 1898.75 agütsüoogo

Kohima, Luroi/August 12 (TYO): Department of Expenditure, Ministry of Finance, Government of India ajanga August 09, 2021 nü state 17 nem Post Devolution Revenue Deficit (PDRD) Grant indang 5th monthly installment sen crore 9,871 sayaogo.

Anungji 5th installment sayaba ajanga 15th Finance Commission-i tuyuba ama temsüa aliba state tem nem Post Devolution Revenue Deficit Grant ama ajak senteper sen crore 49,355 salaogo, ta Finance Ministry ajanga ashi.

Nagaland nema 2021-22 küm atema August 09, 2021 nü Post Devolution Revenue Deficit (PDRD) Grant indang 5th monthly installment sen crore 379.75 agütsüoogo. Tang financial year (2021-22) nung instalment pongu nung PDRD Grand ama sen crore 1898.75 agütsüoogo, ta Finance Ministry data ajanga ashi.

Finance Commission ajanga financial year 2021-22 atema State 17 nem Post Devolution Revenue Deficit Grant sen crore 1,18,452 agütsütsü ashi.

State indang post devolution nung Revenue Accounts nung meperi aliba peritsütsü asoshi iba

teyari ya state tem dang 12 monthly installment nung agütsür.

15th Finance Commission ajangasa Post Devolution Release Deficit teyari ya state 17; Andhra Pradesh, Assam, Haryana, Himachal Pradesh, Karnataka, Kerala, Manipur, Meghalaya, Mizoram, Nagaland, Punjab, Rajasthan, Sikkim, Tamil Nadu, Tripura, Uttarakhand aser West Bengal nem agütsütsü ashi.

2021-22 nung post-devolution revenue account indang sentsüh menoktsü asoshi Grant-in-aid installment asemuba nung Nagaland den külemi Kerala nem sen crore 1657.58, Himachal Pradesh nem sen crore 854.08, Punjab nem sen crore 840.08, Assam nem sen crore 531.33, Andhra Pradesh nem sen crore 1438.08, Uttarakhand nem sen crore 647.67, West Bengal nem sen crore 1467.25, Manipur nem sen crore 210.33, Meghalaya nem sen crore 106.58, Mizoram nem sen crore 149.17, Tripura nem sen crore 378.83, Tamil Nadu nem sen crore 183.67, Haryana nem sen crore 11, Karnataka nem sen crore 135.92, Rajasthan nem sen crore 823.17 aser Sikkim nem sen crore 56.50 agütsüoogo, ta Finance Ministry ajanga ashi.

ANCSU-i coaching institutes tem sorkar tazüokba küboki aidaktsütsü mepeshi

Dimapur, Luroi/August 12 (TYO): All Nagaland College Students' Union (ANCSU)-i sangdong ka ajanga, coaching institutes tem state sorkar tazüokba küboki aiddaktsütsü mepeshia metetdaktüoogo.

ANCSU-i ashiba agi, Nagaland nung coaching institutes balala amenokba ajanga kakat shisatsü bushiba nung state renloka aoba nung teyari agüja arudar aser kasa mapang nung item shisaluymdak ajanga allied courses, competitive tatidang aser technical tatidang tem nung kaketshirtem nem teyari tulu agüja arudar. Item shisaluymdak balala ajanga kaketshirtem aser tatidang balala atema renemshirtem nem teyari agütsüba tenüing asangtsü langa lir.

ANCSU-i item shisaluymdak ya tanga educational institutes tem dang nungi tajemba masü ta

asatetogo aser parnok inyakyim tushitsü langa lir ta bilemer, ajisiüka kasa mapang nung item shisaluymdak balala ya state educational regulation/authority küboki aittsü nungdaker.

Item shisaluymdak karbotangari senotsü teyari agüja amenokba, karpei sasa aser kar tanga nungtugu institutes tem den longjemer amenokba lir. Temetetsü kaji item coaching institute tem ya state indang authority/regulation/educational department küboki ait mali. Anungji ANCSU-i state sorkar dang item shisaluymdak ajak züngoksemaktsütsü aser kecha tetsükdaktsü makai inyaksangshidaktsütsü atema asadanga alitsü benokdangogo, ta ANCSU Tir Vimetiexho Vitso aser General Secretary Imnameren N Jamir nati külem sangdong ka ajanga metetdaktüsü.

Lovlina nem sen crore ka aser DSP mapa agütsü

Guwahati, Luroi/August 12 (Agencies): Tokyo Olympics nung boxing asaya nung bronze medal anguba atema Assam sorkari Brehostibarnü Lovlina Borgohain nem sen crore ka aser DSP mapa agütsüoogo.

Brehostibarnü Srimanta Sankardev Kalakshetra, Guwahati nung tetushi agütsüba sentong agiba mapang Assam chief minister Himanta Biswa Sarma-i Lovlina nem sen crore 1 indang cheque agütsü.

Iba dak alia Guwahati nung lenmang ka Lovlina tenüing nung jatsütsü aser Golaghat nung la tenüing nung stadium ka yanglutsü, ta chief minister Sarma-i metetdaktüsü.

Assam sorkarisa la indang coach nem sen lakh 10 agütsütsü

telemtetba agiogo.

Lovlina, Brehostibar anepdang Guwahati tonga aru. La Chief Minister Sarma-i Lokapriya Gopinath Bordoloi International (LGBI) airport nung agizük. Arishi küm 23 tain boxer-i, Olympics nung gold medal mongutetba atema la mepelar ta ashi.

"Maneni ni Assam nungertem dang kanga pelar. Ni gold medal mongutetba atema mepelai bilemer. Ajisiüka ni agizüktsü atema nisung aika aruba atema kanga pelar. Nenok temoatsü ajanga ni Olympics bronze medal ngutetogo," ta Lovlina-i airport nung osangbenertem dang ashi.

India nunger boxer tem rongnungi Golaghat district kübok Baro Mukhia yimtsüing nungi boxer yagi dang medal nguteta liasü.

NAFCC Steering Committee senden menogo

Dimapur, Luroi/August 12 (TYO): 3buba National Adaptation Fund for Climate Change (NAFCC), State Level Steering Committee senden August 12 nü Secretariat Conference Hall, Kohima nung menogo. Iba senden ya Chief Secretary Nagaland, J Alam, IAS lenisüba nung mena liasü.

Senden nung Nagaland nung NAFCC project benokba indang Joint Director, SARS Temsuinla-i tatsü agi metetdaktüsü. Lai ashiba agi, "Gen Pool Conservation of Indigenous Rice Varieties under Traditional Integrated Rotational Farming System (Jhum optimization) for Promoting Livelihood and Food Security as Climate Change Adaptation Strategy in Nagaland" nungia agütsür project ka 2019 küm April ita amenok. Iba project atema Ministry of Environment Forest and Climate Change, Government of India-i senotsü teyari agüja liasü. Laisa, iba project ya Nagaland kübok district 5 nung yimtsüing 22

ajemyimjema inyakdar aser iba ajanga kibong 1000 shi ajanzükdar, ta ashi.

Maneni senden nung project mapang atsülangshitsüba densema onük balala benoka sensaksema liasü.

Project dak sendakba nung APC, Kikheto Sema, IAS-i, iba project ya küm 3 atema liasü, ajisiüka senotsü mapang shidak nung magütsüba den COVID-19 wara pokteta state ajunga mokdanga ayuba aser state nung tzinglu mapang talangka maruba, koba ajanga district kar nungbo tsünüsenpongtsü dak kongshioogo, item kulitem ajanga iba project mapang shidak nung benoka minyaktet, ta ashi.

Paisa, item kulitem dak ajemdaker house dang, project tembanga inyaksü atema 2022 küm March ita tashi mapang atsülangtsütsü asoshi Ministry dang mepeshitsü benokdang, koba house-i agizüka liasü.

Nagaland nung NAFCC Project

nükjidongji, tekonglu asadangtsü, kibong shia I ha tekonglu treatment atema teyari agütsütsü, tetsütebou mapang nungi amshia aruba jang tapu balala aser tanga tsünüsenpongtsütem indang Germplasm yanglutsü, 1000 ha tasazük nung tsük tabu balala adentsü atema ajungkettsü, vermicomposting units 100 amenoktsü asoshi lir. Maneni iba project kübok tzü wazüka ayutsü atema gully plugs, loose boulder check dams, bench terraces yanglutsü aser limesdema amala maparen benoka inyaksü

NAFCC project kübok SAPCC (State Action Plan on Climate Change) aser NAPCC (National Action Plan on Climate Change) aser National Bank for Agriculture mission tapet kübok aliba lenlatem nung tzümopung asüingsangshidaktsütsü atema tenüingdabatem dak tali rangloker inyaker aser iba atema Rural Development (NABARD) ya National Implementing Entity lir.

Nagaland nung lendong balala atema sentong yanglua inyakba mali

Kohima, Luroi/August 12 (TYO): Linük nung menoknok tali anokba zone nung Nagaland ya shilem ka lir, koba dang 'very High Damage Risk Zone' ta ajar, saka state nung Disaster Management ajanga senotsü amshiba indang audit agiba nung 2014 nungi 2019 tashi nung State, District mesüra Sub-Division aser yimtsüing nung alimar lendong balala nungi kümzüktsü asoshi sentong yanglur inyakba mali, ta ajitet.

Comptroller Auditor General of India (CAG) ajanga tawa aliba State Assembly nung March 31, 2019 tashi Nagaland indang general, economic aser revenue sector indang report agütsüba nung metokmeperi ya ajiteta liasü.

State Disaster Management Plan aser District Disaster Management Plans (2012-13) ya State Disaster Management Authority ajaga agizüka mali aser sendaktepa aliba department temia parnok indang Disaster Management Plans yanglua mali, ta ashi.

State sorkari state nung District Disaster Response Fund, State Disaster Mitigation Fund aser District Disaster Mitigation Fund amenoka mali, ta CAG osang ajanga ashi.

Item tenüingdabatem meperitsüba ya Disaster Management Act, 2005 nung aibelenba kisüing masü saka state-i alimar yimya nung lendong balala ajuruba atema renemshiba aser telanzüba/teyari agütsüba nunga kongshitsü, ta ashi.

Cyclone/mopung tesashi, menoknok, anentsüh amala nungi kumzüka ayutsü asoshi ki nung 'structural design' amshia mali, kechiaser state sorkari Nagaland Building Bye-Laws, 2012 mapa kuma meinyak, ta ashi.

Senotsü ketdangtsüba tsütsü Nagaland State Disaster Management Authority (NSDMA) ajanga sen crore 351.05 agizükogo aser iba nungi kasa mapang sen crore 327.57 amshi.

Ajisiüka shia aliba ama accounting system nung anüingzükba sen ya mamshi aser Cash Book anepalu masü, ta ashi.

DDMA temi sen crore 28.59 ya ajunga mamshi, aser 2015-19 mapang State Disaster Response Force nem senotsü (Central plus State share) agütsüba nung anogo tenet nungi 69 tashi menur agütsüba ngutet, ta ashi.

Internal Control Systems tashi mait liasü, anungji osettsüet balala

atema stock register, mapa inyakba atema measurement books tem mamshi, ta ashi.

Sen crore 60 shi jenjang NSDMA ajanga mapa inyakogo ta shia aliba jangjatsü asoshi tsüingtong oa repringdang mangu mesüra mapa inyakba indang jangjatepba measurement books meliasü, ta ashi.

Lendong timtem balala ajurur alir nisung 2,590 nem NSDMA ajanga teyari shidak magütsü. 2016-18 mapang timtem ajurua aliba nisung 2,590 nem sen crore 15.33 agütsütsü aliba nungi sen crore 1.48 dang agütsü, anungji sen crore 14.05 agi mabensa teyari agütsü, ta CAG ajanga ashi.

Lendongtsüdong balala ajuruba mapang renemshia alitsü asoshi NSDMA, State Executive Committee aser District Disaster Management Authorities (DDMAs) temi quarterly review meeting teti mamen, ta ashi.

NSDMA/DDMAs ajanga 2014-15 aser 2018-19 mapang mock drill khen-khen dang agia liasü aser awareness/training sentong peria magütsüba ajanga lendong timtem ketdangtsütsü asoshi renemshiba nung anünga aliba sayur, ta ashi.

(Maneni tapak 2 nung...)

Nagaland COVID-19: Cases tasen 80 aser tasüba ana liasü

Dimapur, Luroi/August 12 (TYO): Nagaland nung Brehostibarnü COVID-19 tashidak nisung tasen 80 dak putet aser tasüba ana liasü. Tesüba ghonda 24 tsüngta state nung kasa tashidak nungi taneptsü angur nisung 82 liasü.

Dimapur aser Kohima nungi nisung kaka iba tashidak agi asü, ta Health and Family Welfare

Department ajanga ashi.

Cases tasentem ya Dimapur nungi 29, Kiphire nungi ka, Kohima nungi 21, Longleng nungi 7, Mokokchung nungi 18, Peren nungi ana, Wokha aser Zunhebotu nungi kaka alitsü.

Kasa mapang taneptsü angurtem ya Dimapur nungi 17, Kohima nungi 37, Longleng nungi ka, Mokokchung nungi 20, Mon

nungi ka, Peren nungi asem, Phek nungi ana aser Wokha nungi ka alitsü.

Tang tashinung COVID-19 agi state nungi nisung 28,955 menepa lir aser active cases 1,347 alitsü. Iba tashidak agi state nungi nisung 579 süoogo aser nisung 26,183 taneptsü nguogo. Ajak senteper nisung 832 danga state balalai ogo, ta sangdong ajanga ashi.

Dimapur Press Club ajanga asüku lemsateper

Dimapur, Luroi/August 12 (TYO): Nagamese Khobor osangkaket kibur aser taoba Yimozüül, Lemei Phom August 12, 2021 nü Dimapur nung

asüba osang angashia sasar aser mang ayimer, ta Dimapur Press Club ajanga sangdong ka nung ashi.

Dimapur Press Club ajanga

mangyimer kibong den asüku lemsateper. Asür tanüla tesunep nung anisüingzükjangma, ta DPC sangdong ajangasa ashi.



Janata Dal United (JDU) Nagaland nungi tir NSN Lotha, tongti zülur Kitoho S Rotokha aser state executive Hatpha Wangsa nungeri August 12, 2021 nü Udyog Bhavan, New Delhi nung Minister for Steel, Government of India, Ramachandran Prasad Singh aka RCP Singh ajurua liasü. Iba mapang JDU, Nagaland ajanga Minister nem tenüngsang agütsü aser takum tajung, arishia talang den pa mapa nung takokba lidakjang ta maotsü.

FOCUS 4th Project Steering Committee senden menogo

Dimapur, Luroi/ August 12 (TYO): Fostering Climate Resilient Upland Farming System in North East (FOCUS) - Nagaland, 4th Project Steering Committee senden August 12 nü Secretariat Conference Hall, Kohima nung menogo.

Senden nung Chief Secretary Nagaland, J Alam, IAS-i, Agri aser Allied Department aser project dak sendaka aliba department ajak dang FOCUS project takok ngua inyaksü atema teyari agütsütsü mepeshia metetdaksü. Paisa, iba project ya state nung aluyimertem nem teyari agütsütsü atema tashi lir ta ashi.

Project inakyim indang metetdaksüba mapang APC & Mission Director FOCUS, Kikheto Sema, IAS-i, iba project ya aluyimertem nem tekonglu ayimba inakyim tajungba angazükdaksütsü

asoshi asameyanga benokogo aser iba ajanga tsünisenpongtsü timba adokdaksütsü aser mapang talangba benoka inyaktetsü. Iba ajanga ecological balance ka adokdaksütsü, aluyimertemi senotsü timba atsü, tekonglu ayimba kibongtem nem tanga aluyimba yimya reprangzüka inyadaksütsü atema teyari agütsütsü aser aluyimertemi shishilembadak yoktetsüsa tsünisenpongtsütem tsünüyonga aoba mapang shishilembadak den sensaktepsü atema teyari agütsütsü, ta ashi.

Project nükjidongji aluyimba ajanga rongsen tali aatsü aser tzümopung melenshiba tizüksüsa jenjang yanglutsütsü atema lir. Iba nükjidong ya tenem nung alu ayimertemi senotsü tali aazüksü atema aluyimba yimya tasen benoka inyakba aser environmental

sustainability tali kümdaksüba ajanga tongtetsü, ta pai ashi.

Maneni pai, iba project takok ngua inyakyong aotsü atema tetemsü ketdangsurtem yokba atema Agri aser Allied Department tem dang kanga pelaba metetdaksü.

Senden nung FOCUS project nung district tasen asem bendenloktsü asoshi sensaksemba densema onük balala benoka sensak asem. Noklak sub-division district kümdaksüba aser Tuensang aser Peren nung 2019-20 küm World Bank project tem tembanga inyakba sülen item district asem ya tanungba küm asem atema FOCUS nung bendenloktsü tetemsü lir ta bilema benok. Iba dak sendakba nung Project Steering Committee-i, district asem ya bendenloktsü atema Directorate of Economic Affairs, GoI dangi abentsü lemtet.

Anusha Projects (P) Limited ajanga Ambulance tenla agütsü

Dimapur, Luroi/August 12 (TYO): Anusha Project (P) Limited ajanga Chief Medical Officer, Wokha nem August 12, 2021 nü ambulance ka tenla agütsü liasü. Iba ambulance amoktsüba sentong ya Deputy Commissioner, Wokha indang Office Complex nung agia liasü.

Sentong tatsüka DC indang Conference Hall nung agiba mapang, Anusha Project (P) Limited indang General Manager, Reddy-i ashiba agi, district nung ambulance service nüngdaka aliba nüburtem yaritsü tangatetba nung company-i ambulance ya agütsü, aser mapa tilaka dang süaka district nung nüburtem

ajanzüksü imlar. Wokha jila aser temeket tesemtem nung company ajanga mapa balala inyakba mapang nüburtemi yariba aser amalitep akaba asoshi tepela temaitsü iba ambulance ya agütsü, ta pai ashi.

Nüburtemi amalitep akaba aser yaritepba ajanga mapa tetsükdak majurui inyaka arur, aser district nung aliba nüburtem nem lenmang tajung yanglutsütsü asoshi maneni yaritepsü ajungshir, ta pai ashi.

Deputy Commissioner, Wokha, Orenthung Lotha ajanga company dang pelaba lemsatepba mapang, Wokha District Task Force aser Wokha jila nung aliba nüburtem asoshi

anogo tajung ka lir, ta ashi aser parnoki mapa tajung inyakba ya Wokha nung aliba nüburtem molungjang nung teti alitsü, ta ashi.

Tashidak wara agi tesem ajunga asungba ajanga company nunga tetsükdaksü balala ajuruaka district nung nüburtem nem lenmang tajungtiba yanglutsütsü asoshi meranga inyaker, ta pai ashi.

Lotha nung tenung nung Lotha Hoho tir Er. Mhondamo Ovung ajanga Anusha Project (P) Limited dang pelaba lemsatepba liasü. Paisa department dang nübur ajanzüksü asoshi ambulance ya anepalua aser ochishia amshitsü ayongzüka liasü.

Nagaland nung lendong balala ...

(TAPAK 1 NUNGI...)

State Emergency Operation Centre ya Kohima nung taa agütsüba ki ka nungi inyaka liasü, kong Video Conferencing atema facility kecha mali aser State emergency contingent plan mali, aser lendong ajurba mapang osang agitepsü asoshi NGOs/first responders tejangja mali, ta ashi.

District Emergency Centres nunga tongtipang facility mali aser tongtipang osangtsüsang kecha mali, anungji ajungben lendong atalokba mapang yaritepsü asoshi junga renema maliba sayur, ta ashi.

State nung lendongtsüdong ketdangtsütsü asoshi State Disaster Management Authority

abensa renema mali, kechiaser sentong kecha renema mali, tashi tait tentet peria mali, nübu tetemsü aser hadir shidak mali, ta CAG ajanga tutetsü.

Iba atema CAG ajanga state sorkar dang DM Act, 2005 nung shia aliba ama SDMF, DDRF aser DDMF tentetsüla, ta ashi.

SDRF/NDRF guidelines ajanga ashiba ama NSDMA ajanga sanction süa aliba senotsü shidak

amshitsüla aser anungba sen kumdanga amshitsüla. Codal provisions nung shia aliba ama stocks/equipment dak sendakba nung Cash Book aser danga record tem temolung agütsü anepalutsüla,

ta ashi.

State nung lendongtsüdong nungi ki kumzüka ayutsü asoshi state sorkari Nagaland Building Bye Laws 2012 mapa kuma amshitsü atema nüngdakba meratem agitsüla, ta ashi.

Plans/guidelines nung shia aliba ama nüburtem aser sorkar department tem nung teti mock drills agitsüla, ta ashi.

Maneni lendongtsüdong ketdangtsütsü asoshi junga renemshia alitsü atema Kohima nung aliba aser district tem nung Emergency Operation Centres tem nüngdakba facility inoka shidak inyaksüla, ta CAG janga ashi.

Mokokchung DC ajanga metetdaksü

Dimapur, Luroi/August 12 (TYO): Deputy Commissioner, Mokokchung, Limawabang Jamir ajanga sangdong ka nung, August 15, 2021 nü Independence Day ya akhi ama anepdang 8:40 ako nungi Imkongmeren Sports Complex, Mokokchung nung tenzütsü, ta Mokokchung Town nung aliba

sorkar tenzüker ajak nem osang ka sangoktsüogo.

Anungji sorkar tenzüker ajunga iba sentong nung arua adentsü metetdaksü.

Maneni iba sentong nung adener ajak face mask agitsü aser COVID-19 dak sendakba totuyba aser yimya ajunga amshitsü, ta sangdong ajangasa ashi.

Kohima DC-i I-Day car pass indang metetdaksü

Dimapur, Luroi/August 12 (TYO): Kohima Deputy Commissioner office sangdong ka ajanga, 75buba Independence Day benjungmung atema HoD, tejaokertem aser Awardees tem

dang Deputy Commissioner, Kohima office nungi August 13 nü 10:00 ako nungi tenzüka office mapang invitation cards aser car passes agizüksü metetdaksüogo.



Fazl Ali College Mokokchung ya Tobacco Free Educational Institution (ToFEI) ta August 12, 2021 sangdong aser kuli kaket ka Nukshiwati Longchar, Consultant District Tobacco Control Cell (DTCC) Mokokchung ajanga Fazl Ali College indang vice principal, R Arenla Aier nem amokja liasü, ta Chief Medical Officer Office sangdong ka ajanga ashi.

CM-i 'Nagaland SDG Vision 2030' sayatsü

Dimapur, Luroi/August 12 (TYO): 'Nagaland SDG Vision 2030' aser 'District SDG Localisation and Integration Manual' sayaba sentong August 17 nü Kohima nung agitsü. 'Nagaland SDG Vision 2030' ya Chief Minister, Neiphiu Rio-i sayatsü aser 'District SDG Localisation and Integration Manual' ya Minister of Planning & Coordination, Land Revenue and Parliamentary Affairs, Neiba Kronu-i sayatsütsü.

Nagaland sorkari 2018 küm nungi Sustainable Development Goals (SDGs) mesera Global Goals ya integrate aser localize sütsütsü atema inyaka arudar. Iba document ana sayaba ajanga state nung SDG localize asüba inakyim nung tongtibang shilem

ka agitsü. 'Nagaland SDG Vision 2030' aser 'District SDG Localisation and Integration Manual' sayaba sentong tembangba sülen SDG India Index 2020-21 aser 'Multidimensional Poverty Index' (MPI) dak sendakba nung 'State-level Workshop ka agitsü. Iba Workshop nung shisalen agütsürji NITI Aayog nungi ketdangsurtem asütsü.

Iba workshop nung SDG India Index 2020-21 dak ajemdaker Nagaland indang SDG inakyim aser renloka aotsü atema lenmangtem indang sensak asemtsü. Maneni state nung multidimensional poverty concept dak sendakba nung sentong balala, scheme aser policy tem indang benoka sensak asemtsü.

State sorkar aser kin balala HOHO tem senden ayonger

Dimapur, Luroi/August 12 (TYO): August 10 nü Cabinet senden nung teletetba agiba dak ajemdaker kin balala hoho tem den August 18 nü 10:00 ako nungi tenzüka senden ka amentsü ayongzükgogo.

Senden nung sensak asemtsü onüktem:

- Zeliang aser Sumi kin tsüngda Peren aser Dimapur district arrtsü nung mangatetep aliba bentetsü asoshi sensak asemtsü
- ULB tem nung tetsürtem atema menden mekazüksütsü
- Naga nung sobaliba temzüng ozüng dak ajemdaker obendangtsü atema Naga Tribunals
- Jila balala nung Gaon Buras (GBs) shimtsüba ken o

Iba senden nung Nagaland Chief Minister, Deputy Chief Minister Speaker, NLA, Minister aser Advisor tem den Chief Secretary, Nagaland aser tanga ketdangsurtemi shilem agitsü.

Senden nung teküboklen agütsü aliba lenirtem arua shilem agitsü mepeshia metetdaksüogo.

- Angami Public Organization, Kohima tir aser züngsem ana.
- Ao Senden, Mokokchung tir

aser züngsem ana.

3. Chakhesang Public Organization, Phek tir aser züngsem ana.

4. Chang Khulei Setsang, Tuensang tir aser züngsem ana.

5. Konyak Union, Mon tir aser züngsem ana.

6. Khiamiungan Tribal Council, Noklak tir aser züngsem ana.

7. Lotha Hoho, Wokha tir aser züngsem ana.

8. Phom People Council, Longleng tir aser züngsem ana.

9. Pochury Hoho, Meluri tir aser züngsem ana.

10. Rengma Hoho, Tseminyu tir aser züngsem ana.

11. Sumi Hoho, Zunheboto tir aser züngsem ana.

12. United Sangtam Likhurn Pumji, Kiphire tir aser züngsem ana.

13. President, Yimchunger Tribal Council, Shamator tir aser züngsem ana.

14. Zeliang Peoples Organization, Peren tir aser züngsem ana.

Iba senden ya State Banquet Hall, Kohima, Chief Minister's Residential Complex, Kohima nung amentsü.



ENTREPRENEURS ASSOCIATES

we're hiring!

Local Resource Person

- QUALIFICATION: GRADUATE
- A RESIDENT OF CHANGTONGYA AREA, PREFERABLY FROM AKHOYA VILLAGE.
- BOTH FRESHERS & EXPERIENCED CAN APPLY. PREFERABLY HAVING WORKING EXPERIENCED AT COMMUNITY LEVEL.

Send your detailed resume at:

eanagaland@gmail.com

9366745467/8837267083

On or before 15/08/2021

NE nungi police 9 nem Union Home Minister naroküm agütsütsü

Guwahati, Luroi/August 12 (Agencies): Northeast nungi police teku (9) nem Union Home Minister's Medal for Excellence in Investigation 2021' agütsütsü.

Linük nung tesem balala nungi ajak senteper police ketdangsür 152 nem Union Home Minister's Medal for Excellence in Investigation 2021 naroküm agütsütsü.

Naroküm agizüktsüpurtem rongnung tetsür police ketdangsür 28 densema lir.

Police 152 rongnung Assam nungi pezü aser Manipur, Mizoram, Meghalaya Nagaland aser Tripura nungi kaka densema lir.

Assam nungi naroküm agizüktsü aliba police ketdangsür pezü ya SSP Bibekanand Das, DSP Dr Rashmi Rekha Sarmah, Inspector Sukumar Sinha aser Si Dipankar Gogoi lir.

Northeast nungi tanungba police ketdangsür pong rongnung W/SI - M Priyadarshini

Devi (Manipur), DSP Banraplang Jyrwa (Meghalaya), SI VL Chama Ralte (Mizoram), UBSI - Temsuyangba Ao (Nagaland) aser WSI Rita Debnath (Tripura) densema lir.

Iba naroküm ya 2018 küm nungi agüja arudar. Bushitsüngdang jenjang ajungkettsü aser bushitsüngdangba ketdangsürtem mapa tajung reprangteta tushitsü nukjidong nung iba naroküm agütsütsü atema amenok.

Mizoram nung tanur 128 densema nisung 576 dak COVID-19 putet



Aizawl, Lroi/August 12 (Agencies): Mizoram nung Bresthostibarnü nisung 576 dak Covid-19 tashidak putetba sülen state nung tashidak menar 46,896 jungogo, ta health department ketdangsür kati metetdaksü.

Taoba ghonda 24 tsüngda Mizoram nung Covid-19 tashidak agi nisung ana süogo aser tang tashi nung iba tashidak agi nisung 173 süogo, ta paisa metetdaksü.

Tasidak puteter nisung 576 rongnung Aizawl district nungi 323, Kolasib district 71,

Champhai district 57, Lunglei district 38, Lawngtlai district 35, Mamit district 28, Siaha district 17, Saitual district 4, Hnahthial district 2 aser Serchhip district nungi nisung ka densema lir, ta pai ashi.

Tashidak menartem rongnung tanur 128 aser Border Security Force (BSF) 8 densema lir.

Tashidak menar alir nisung teku tangalen senzusenpongba jangjaogo aser tanungba nisungtem ajak state nung tashidak mena, ta ketdangsüri ashi.

Tashidak menar 576 rongnung nisung 313 dakbo Covid-19 tashidak keta aliba temaitsü keta lir.

Mizoram nung tang nisung 11,989 tashidak menar temang anepaludar aser kasa mapang nung Bodhbarnü nisung 1,012 taneptsü anguba densema nisung 34,734 taneptsü nguogo.

State nung tang recovery rate 74 per cent aser death rate 0.36 per cent lir.

Mizoram nung tang tashi nung sample lakh 7 dak tema tendangogo.

State immunisation officer Dr. Lalzawmi-i ashiba agi, tang tashi nung nisung lakh 6.42 nem vaccine agütsüogo aser parnok rongnung nisung lakh 2.13 bo Bodhbarnü tashi nung covid vaccine dose anaprongla agiogo.

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang H. Umar Chesam contact no.8416087414 / 7627998690
Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM -Yours sincerely - T. Ali Ao, Add: Duncan Basti (9436603215)**



Manipur telungpurtemi ID nü state mokdangtsü ayongzük

Imphal, Luroi/August 12 (Agencies): Manipur nung amenoker aliba telungpur telok troki kümtetba telok Corcom-i, Independence Day nü state mokdanga ayutsü ayongzükogo.

Ajisüaka iba tenokdangba ajanga essential service tem dak mekongshitsü ta telungpurtemisa metetdaksü.

Temetetsükaji Northeast nung telungpur telok timbai Independence Day mamungtsü aser parnok state mokdanga ayutsü sangdongogo.

Manipur nung August 15 nü anepdang 1:00 ako nungi nikongtsütsü 6:30 ako tashi state ajunga mokdanga ayutsü sangdongogo.

Iba dak sendakba nung

Manipur sorkari police aser state nung amenoka aliba paramilitary force tem dang Independence Day matong tsüngda state nung security akangshitsü tetuyuba agütsüogo.

Independence Day matong tsüngda timtem lendong balala nungi jenbotsü atema Manipur kübok tongtibang tesemtem nung security akangshiogo.

Assam Rifles, Manipur Rifles aser security agency balalai state police nem metita aoba sentong aser tongtibang tesemtem nüka ataba nung teyari agütsüdar.

Telungpurtemi atsük alitsü ta temulung meleme bilemba tesemtem ajak meita odar.

Tripura Police-i TMC lenir Abhishek Banerjee anema ken o benok



Abhishek Banerjee

Agartala, Luroi/August 12 (Agencies): Tripura nung police-i TMC national general secretary Abhishek Banerjee anema ken o ka benokogo.

Maneni police-isa, TMC lenir Dola Sen, Kunal Ghosh aser Bratya Basu nung anema-a ken o benokogo.

Khowai nung duty nung aliba police tem inyaksangshi minprongba atema TMC lenirtem anema ken o benokogo.

Ken o ya Khowai police station nung benokogo aser TMC lenirtem ya Indian Penal Code (IPC) section 186/34 dak ajemdaker aitsüogo.

Khowai Additional SP aser SDPO den tim masüba yimya beshiba aser parnok mapa nung tetsükdaksü adokdaksüba atema police-i TMC lenirtem aija liasü.

Party worker tem amakba osang angazükba sülen TMC MP Abhishek Banerjee ya Deobarnü Tripura-i aritepa ao.

Abhishek Banerjee-i anir TMC lenirtem Khowai-i ao aser pa den tanga party züngsemtemi police station nung longkak aita liasü.

Abhishek Banerjee-i, Tripura nung democracy aletsetba atema BJP aitsüogo.

Assam Police-i tetsür chanu ka kümzük

Guwahati, Luroi/August 12 (Agencies): Temesepba mozü shibelener Dhemaji district nungi tetsür chnu ka pur orr aliba Assam Police-i kümzükogo.

Tetsür chanula ya Arunachal Pradesh, East Siang district kübok Pasighat anasa arem ka nungi Assam police-i Bresthostibar anepdang kümzükka anir aru

Iba osang ya Assam DGP Bhaskar Jyoti Mahanta-i jangjatsüogo.

Iba ken o nung aija alisang ya temesepba mozü shibelener Arjun Pegu ta jangjaogo.

"Temesepba mozü ajanga nisung ka tazüokba makai kümdaksür. Item nisungtem yagi

tanur tila densema shinga metoktsür aser aji Dhemaji-i yashi ajangshiogo," ta Assam DGP Bhaskar Jyoti Mahanta-i ashi.

Tekümzükba maparen ya Dhemaji Police-i ayongzükka Pasighat Police den longjemer inyaka liasü.

"SDPO Jonai & @DhemajiPolice-i tanep tetsür chanula kümzükogo. SP, Pasighat aser Pasighat nung alirtemi onok nem teyari tulu agüja liasü," ta Assam DGP Bhaskar Jyoti Mahanta-i tweet asü.

Arunachal nungi anir aruba sülen tetsür chanula ya lar tsürapur den longjemogo.



TIR YIMYIM YIMOBILEM (EDITORIAL)

DIMAPUR ROGONÜ, LUROI (AUGUST) 13, 2021

Tangar dak atsükokba government

Yimten nüchiso tejangja akaba kin, par lima nung pari yimsü asür, anungji government-ji par government saka tangar dak atsükoker yimsü asüba Afghanistan lima aser par government dang nungi alima kintem ajak tan asütsüsa tang agi anaben aseben tashi atalokdagi. Akhidang 1979 küm Soviet Union (USSR) aliba mapang parnoki ajungbena ka dang Afganistan atsünga adok aser iba mapang nung jagi Afghanistan ya Soviet Union o US na tsüngda raktepba lima ka ama kuma adok. Iba mapang Afghanistan nung yimsüsürtemi Pakistan den jungtepa liasü aser Pakistan ya tanü ama masü, iba mapangjibo China den dang masü saka America nungertem dena tesendaktep junga yua liasü. Iba jagi Soviet Union tipmedemi kümdaktsü aser Afghanistan limaji parnok kübok ayu. Iba mapang Afghanistan nungi Soviet purtem meindoktsü asoshi America nungertemi Afghan nunger kar ayongdena telok ka tentet aser iba telok jagi par lima nung Soviet nunger yimsüsüba anema rara aser 1989 kümbo Soviet Union yimteni Afghanistan toktsütsüsa aküm. Iba sülen Afghan nunger telokji Taliban telok aküm aser parnoki Afghanistan government atsüngdoker 1996 küm nungi yimsü asütsü tenzük. Parnoki yimsüsüba mapang 1999 küm India nunger tayimtsü ka anüng tom nung rakzüka bener oagi Kandahar nung yur, India ket nung Taliban purtem pua aliba chiochtsü asoshi akangba otsü asenok aikati meteta lir. Iba sülen 2001 küm September 11 nü Al-Qaeda teloki anüng tom nung tayimtsü rakzüka bener oagi US yimitem amakba ajanga Afghanistan nung Taliban yimli tatembang kati arutsüsa aküm, kechiyong parnoki Al-Qaeda lenir Osama bin Laden par lima nung jenokdaksü aser US-i meshiaka magütsü. Ibayongji, US nungertemi Afghanistan nungi Taliban meindoker Afghanistan nunger yimten lenirtem nem yimsüsütsü maongka agütsü. Aji oda, Taliban telokjia US nungertem teyari ajanga dang Afghanistan nungi Soviet nungertem aridoker yimsü asürtem liasü aser ano parnok melena 2001 küm nungi tang tashi yimsü asürtema US sepaitem arua Afghanistan nüka alidang yimsü asürtem lir. Ibayongji, tang Afghanistan nung küm 20 shi lir külen US sepaitem meyipa aotsü tenzük metenzük ka, Taliban teloki Afghanistan asemsü shilem nung anasübo agiadokogo aser taküm küm ya matemdangsa parnoki Afghanistan government atsüngdoker melentsüba tensa tia tashi nung odagi. Afghanistan nung US sepaitem medeni Taliban telok den mararateter, anungji Afghan sepaitem aika US nungertemi agütsüba raraba oset ajak yutsür jena aoer aser aika pua tepsetdaksür. Iba ama tensa tia ka nung, US tir Joe Biden-i joko Afghanistan nunger yimten yimsüsürtem longjemer Taliban den raratetsüla, kechiyong taoba küm 20 tashi US government sen aika endoka Afghan sepaitem anitetogo aser Afghan lima nüka aruogo, joko tangbo US sepaitem meyipa arur pei lima anüksü nungdak adoker ta metetdaksüogo. Tetezü, Talibani Afghanistan atsüngteta yimsü asüyonga ojang, US sepaitem meyipa meyoctetsü ta US tir-i ashir ta angatetter. Iba ama tia ka nung, Afghanistan government nung alirtem asoshi teyari angudak lenmang mali kümogo, anungji parnok atema Taliban den yimjung nung ken o jembu tenzüksü asü mesüra tatem tashi raratsü ta asüba terata tia nung lir. Atangji, akoktsü teimla kangabo mali nungji, Afghan yimten lenirtemi Taliban den yimjung nung külemi yimsü asütsü asoshi bilemer saka Taliban teloki telangzüba tajung magütsü lir. Atangji, akhi ama masü US nunga nübortem rongnung petsaperong kanga lir, anungji pei lima mazüoktet ser tangar lima azüoktsü merangba nung pei nübo aser rongsen endoktsübaji sentong tajung masütsü. Iba ama alima tensa tia ka nung, US tashi dak atsükoker aliba Afghanistan government peisasa pei mekümzüktsüsa anogo shia tia tamajungbai aiba angur. Ashiko, US o Taliban na tsüngdaa tangatettep ken o karbo renema alitsüa akok, kechiyong tapi agibo, odang repranga lia parnoki nüka aliba yimten ka matsüngdokdaksütsü. Aji oda, Taliban teloki tang nungjibo US anema kiralongraba mapa kecha meinyaktsü aser kiralongrar telok shinga dena memedemtsü ta nangzükterra, US asoshibo aji anisüngzük tuluka asütsü. Ibai dang masü saka Taliban teloki akhi tejen tangatetbatem toktsür, Afghan tsürtem kaketrejui aotsü melatsü aser mapaa pei inyknüba inyaktsü ta tetsürtem nem temeten agütsüra, ibajia US asoshi takok ka ama züngshitsü. Koba ama kechi lima yimten den tangatettep yanglur pei lima nung yimsü südir süang, tangar kidang chiso yur, tangar nem nükdakja yimsü süra, ibajibo yimsü asür masü, tangar lar akümer. Iba ama yimtenji manger sangwa nung laoadoktsü aser iba ama lima nung nübortem petsaperong aser azütokshi manentsü. Afghanistan lima nung ataloka aruba nung ya, asenoka, tangazüksü tongtibang karbo lir ta bilemer.

OLEMSABANG

ELECTION ASER TAMANGER

- Rev. Dr. Noklen Longkümer, Pastor Ungma

(Yashi adok nungi...)

Nagaland anebtsütsü Tsüngrem kabu nung lir :

Nagaland state amenlokba kimong, nüburtanela taküm jenjang ka-danga indang indang nokdaka aliba mangur. MLA-temi par mapa mejangja, nüchiso bushiri kong koda yimden lemtettsü memetet, külen State sorkarano temabo tema nungsa alir saka tenüngbo telungpur sorkar ta budget ka nungi lemsaba ajanga tanü asen lima nung luyim ajak abensa aliba college aser university metenzükter, state mesüra centrally sponsored industry ka danga takok ngua moteter, governmenti ayuba mozü ki nung taküm kümzüktsüsa nungdakbaoset tajung bener maruteter, lenmang tajung mali, educated youth asoshi job aser business opportunity sadema mali, oda sorkar aliba temaitsü kecha mali kümago. Tejen Lai tendak Yihuda chuba Uzzia, Yotham, Ahaz aser Hezekia nunger mapang Yerusalem yimti tia indang Isaiiah ainkari yamai shia angur, "Nenok tetsüng temupu nungi tekolak tashi anema mali" (Isa 1:6) ta shia lir. Iba den saku tanü Nagaland tia lir. Süra iba tia nungi shibai koda Nagaland kümzüktsü? Tsüngrem dak dang asen lima kümzüktsü tashi lir, aser iba tashiji tanü arogoi Kibubai mulungba ama Pa tashi nung inyaktsümulungteta Esther chubatsüri pei kin ayongzükba ama, "Ni asoshi lumiang, anogo asem aonung aser anungdang techiyong aser tajema tejem, ano ni aser kü kilirtsürtema yamaji lumitsü, ajisür ozüng nung meliaka chuba dangi aitsü, samara ni samatsü," ta Esther 4:16 nung shia aliba olaji tanü tamanger ola asütsüla. Kechiaser Nagaland asoshi teimla Tsüngrem den dang lir. Pai mapayuli süra aoi aser metsü kuma samatsütsülanga lir, saka Tsüngremi Solomon Chuba dang ashi ama "Kü nübur shirnok kü tenüng agi ja-a lir, parnok sasa ajemaludi süra, aser sarasademra, aser kü jak bushidi süra, aser parnok lenmang tamajung nungi meyipdi süra, Ni parnok ola angashia parnok temenen atoktsü aser par lima anebtsütsü (2Putipuyang 7:14). Par lima anebtsütsü tetezü tema telung shirangba ajak nungi kümzüktsü tashi Tsüngrem dak dang lir.

O mulung amenshiba :

State nung yimsüsürtemi nübur olamangatsü mulungtetbanung tekong merangba ajanga kechisa ataloka arudagi item ya ajak asoshi tebilemdangtsütulu lir. Kechiba yimsüsüri parnok shimtetba nübur aküm metsübur mesüra mezüngmeshir? Ashiko, nübur shilembo election nung peria agütsüogo, parnok alizükdang indokba sentsü küpdangtsüaser taruba election mapanga kasa küm 5 atema alizüktsü sen bendentsü atema parnoki ni shimtet ta angatetba agi nübur ola manger asütsü-a shibai metet! Tanü State nung nübur miima asüktemba ola "Ayatai! Election süngjang yamai ataloktsü kodanga meimlakani!" Saka teimla lemanng ka lir aser aji ya "Kin koba Tsüngrem Kibuba lir, shir kin pa meyong asütsü shimtetago, parnok tepelatsü" (T. Ken 33:12). Tanüiba ochi oji asenoki agizüka amangdi süra asen lima dang Tsüngremi aochitsü.

O tembang :

Election mapang pei mulungsentsü agi magizükteretaka rongsen dang ngura ojang ta metetsümonga pei tanela taküm tammangdak puoaka yutsübato tanü tashi nüchi jenjang mungui kasa taitsüba tia nungsa lir. Ano kelen MLA, Ministertemi na sen kowi jenjang (election nung nai pa dang kowi meshizükibato pai mamai lir). Ibala tim masübatem kechisa tamangertemi inyaksa ali, itemji karibo amatsü akok, saka nü mulungsentsü nungi item pilatsü makok aser aji Tsüngremi ngua lir. Adianu nai jenbuttsü ta bilemer asü?. Kolen nungi asen tekümzükba arutsu ta bilemer? Ibala ama tarak yabo Tsüngrem san chanu senti zü-i dang shitoktsütet ta amanga yakta Kotaker tebu Tsüngrem dangi ilungdi aser aruya aliba election nungjibo ochi aser temerük shisatsüagi Kibuba dang nai mulungba ama ali yimli yangluba nung kü senti vote agütsütettsüsa nai yariang ta tamang agi sarasadema atatsü ayongzükter. Vote ka jenjang - Ne senti vote ka agi asüng Nagaland tia lemtettsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

CTC kum 50 ajungba nungtem nung kum piyong agia aotsu sentong tenzük



August 10, 2021 nü Aolijen nung Clark Theological College indang Multi-purpose Hall nung 49buba CTC Foundation Day amongdang Dr. Tsüknungrenla, Dr. K. Dhanbir Rai, Prof. Imsutoshi Jamir, Dr. Sunep Imchen, Prof. Mar Pongener, Dr. A. Temjen Jamir aser Academic Dean, Dr. A. Tali Ao nunger külemi tangokba noksa nung angur.

Mokokchung, August 12 (TYO): August 10 nü Aolijen nung Clark Theological College indang Multi-purpose Hall nung 49buba CTC Foundation Day amongdang kum 50 Jubilee mong nungtem nung kum piyong agia aotsu benjung tenzükogo, ta CTC 50th Anniversary Planning Committee Convenor, Prof. L. Imsutoshi Jamir-i sangdong ka ajanga metetdaksü.

Sangkum November 10 nü CTC kum 50 ajungba Jubilee amongtsü.

Tsüngremi len aniba aser kija-kibongtem, Arogotem aser lokti tentet balalai CTC yaria aruba atema tenüngsang agüja College-i kum piyong agia aotsu atema sentong aika yangluogo, aser item sentong rongnung CTC 50th Anniversary Public Lecture Series, CTC 50th Anniversary Publication Series,

Seminars aser Consultations, CTC tenteter züngsemtem, Life members, Patrons, Alumni, Arogo aser Associations den senden aser fellowship densema lir.

Ao Baptist Arogo Mungdang Executive Secretary, Prof. Rev. Dr. Mar Pongener-i sarasadema kum piyong benjungmong tenzükja liasü.

Kasa sentong nungsa CTC Board of Governors Chairman, Dr. Sunep Imchen-i CTC 50th Anniversary Publication Series-1 semzüksü.

'Holistic Engagement to Transform' kaket ya CTC nung Associate Professor of Religions, Dr. K. Dhanbir Rai aser Associate Professor of Pastoral Counseling, Dr. Tsüknungrenla nati 'edit' asü. Mezüngbuba series nung ocet 12 lir aser itemji 2020-21 kum graduate asüba M.Th

azüngertemi züluba lir.

Kasa sentong nungsa CTC Principal, Rev. Dr. A. Temjen Jamir-i Harvesting for Giving Scholarship tenzüksü. Principal-i Arogotem, lokti tentetem, akhidang iba College nung azüngertem aser kija-kibongtem dang, "Ner tanur ana lira CTC nung azünger sensaker aser nungdabapur kaketshirtemji ner chir tasembuba ama agizükang; Ner Arogo Mission Field ka dang lira Clark nung azünger sensaker aser nungdabapur kaketshirtemji tanabuba Mission Field ama agizükang; Ner Arogo nung kum ka nung Ministerial Projects 10 lira Clark nung azünger sensaker aser nungdabapur kaketshirtemji Ministerial Project 11buba ama agizükang," ta mepisha metetdaksü.

India nung raksaa indokba tanurtem atema Arogoi mangyim

August 12, 2021: Alima tesem balala nung kinü tanur tebok nung lia rasaa indokba tanurtem bilemteta India nung Catholic Arogoi parnok atema mangyimba anogo mongogo.

India nung Medical Termination of Pregnancy Act, 1971 benokba sülen kum 50 ajungba nungtem nung August 10, 2021 nü Arogoi raksaa indokba tanurtem atema mangyimogo.

Arogo lenirtemi, iba Act ajanga tanur million aika tetsü no menden nung lia tepsetogo, anungji tanur tebok nung lia tepsetba ya anentsüla, kechiyong taküm kaji Tsüngrem tsüngdang kanga senti aser taküm ajak kumzüksüla, ta metetdaksü.

Catholic Bishops' Conference of India (CBCI) Tir, Oswald Gracias-i sangdong ka ajanga, "Iba ozüng benokba sülen asen linük nung tanur million aika raksaa indokogo, aser taküm ka anema inyakba mapa ya manener," ta metetdaksü.

2015 kum kija nunga India

nung tanur million 15.6 raksaa indokogo, ta pai ashi.

"Tanur aika raksaa indokba atema onoki Arogotem nung mangyima mongogo," ta Kerala Catholic Bishops' Council deputy secretary-general, Jacob G. Palackappilly-i metetdaksü.

"Ozü putirtemi sentong ayongzuka agi aser tetsü no menden nung lia tepsetba tanurtem bilemteta aser akhüm agüja Tenla ki shia nung minute ana shi asüpila tsüngtsüng tema liasü," ta paisa metetdaksü.

Iba anogomong nung India tesem balala nung Khristantemi taküm ka pusemba online programs aser Mercy Hours agia liasü.

"Asenok amai parnokia iba tepor tajung lima nung alitsü temsüa liasü, saka asenoki parnok nem iba lima mengudaksü," ta Jacob-isa metetdaksü.

Catholic Khristan kibongtem danga iba anogomong nung temeja sarasadem ayongzuka agitsü mepishia metetdakja liasü.

India nunger ozüng kübok,

tanur ka maneni abenba ajanga tetsü ka taküm lendongi aitsüsa kumra mesüra la yirura mesüra mental tsütsü timtema adokra; mesüra tanur ka soaka temang nung timtem tulu alitsüsa süra mesüra mata-mabensa asütsüsa süra tanur raksaa indoktsü atema melar.

Iba ozüng tongti nükjidongji mashisa tetsü ka taküm kumzüksü mesüra taneptsü mangutsüsa tanur dak tashidak lira iba nungjagi kumzüksü atema lir, ajisüaka Arogo lenirtemi, iba ozüng ya kanga tim mesüi amshir aser iba ya taküm atema amokmeren ka kumogo, ta metetdaksü.

August 12 nü osangbener den jembidang CBCI nung taoba mapang otongdar, Babu Joseph-i, "Taküm ka meimtsü aser akhümstübuttsü atema mapang tongogo, aji mesüra tarutsü nung meimchirtem kumzuka malitsü," ta ashi.

World Health Organization (WHO)-i ashiba agi, 2015 kum nungi tenzuka 2019 kum tashi kum shia alima nung tanur million 73.3 shi raksaa indokogo.

ANOGO ABEN TSÜNGREM DEN

Sarasademi Tsüngrem tebilemba meteter

Aser anepdang, sangwatsü mapang talangka lia, Pa shishir, azüngmeyakdaki kati ainshia ao aser yangji sarasadem. Mark 1:35.

Yisu anepongi sarasademi aoba nütsüngtemi meteta liasü. Kodang parnoki Pa nungdadir Pa sarasademdaki aotsü parnoki metetta liasü. Kodang Yihudai Yisu ashioktsü, pai tsükchirtem Yisu sarasademdagi anir ao.

Mapang shia Yisu Khristai tongtipang telemtetba agidang Pai sarasadem. Kodang Pa dang Tebu inyakyim nung masü, alima inyakyim mapa inyaktsü atidang, Pai sarasadem (Matt. 4). Kodang nütsüngtem shimtsü mapang aru, Pai aonung tepiyong sarasadem (Lk. 6:12). Tsüngrem chiri Tebui mulungba metettsü asoshi aonung sarasadem süra, Tebui mulungba tejanga metettsü asoshi asenoki mapang kopika agitsüla?

Aiben Yisu telok tului nungpanga liasü, Tebu ola angashitsü asoshi Pai sarasademdak ka nungdak ta Pai metetta liasü. Yisui leman melenshitsütsü meranger nisung aika liasü. Pa nütsüngtem Pa telok alidaki odaktsünü (Mark 1:37). Teloki Pa chuba kumdaktsünü (Yohan 6:15).

Satani pa nükjidong melenshitsü atidang (Matt. 4:3,6,9). Yisui Pa missionji telok tulu anidentsüba masü, saka Tebu dang tashi angaa alitsüba ta angatetta liasü. Sarasadem agi Yisu tenzükba mapa asoshi renemtsü (Lk. 6:12). Sayatenya dang tama sarasadem liasü (Yn. 11:42-43); Lendong mapang nung sarasademi pa tasü itdaktsü (Lk. 9:28-31). Sarasademi Pa kangki-i atutsü tashi tasü itta kumdaktsü (Lk. 22:41-42); aser sarasademi timtem arema kangki Pa tanela odaktsü (Lk. 23:46). Kümtekdakba tatishitsü anidakang aser ne kija sarasadem nung Kibuba den mapang agiang aser ne taküm asoshi mapa renemang.

52buba GMA Dove Awards atema nominations sangdongogo

Nashville, August 12

(Agencies): August 11, 2021 nü 52buba GMA Dove Awards atema nominations sangdongogo; nominations timba angurtem rongnung Elevation Worship, Zach Williams aser For KING & COUNTRY densema lir.

Gospel Music Association (GMA) awards nomination aika angur rongnung- Elevation Worship-i nominations tenet angu aser item rongnung Brandon Lake den külemi "Worship Recorded Song of the Year" category nung nominate asüba densema lir. Lake-ia nomination tenet angu.

"Worship Recorded Song of the Year" category nung nominate süa alirtemji Elevation Worship-i atenba ken "Jireh", Phil Wickham-i atenba "Battle Belongs", We The Kingdom-i atenba "God So Loved," aser Hope Darst-i atenba "Peace Be Still" densema lir.

Elevation nung tongti kentener, Chris Brown-i nomination 9 aser pastor Steven Furtick-ia nomination 10 ngua lir.

"Artist of the Year" award

atema nominate süa alirtem rongnung Lauren Daigle, for KING & COUNTRY, Zach Williams, Phil Wickham aser Elevation Worship densema lir.

Nomination ngua alirtem rongnung CeCe Winans, Lecrae, Crowder, Maverick City Music, Hillsong UNITED, John Cooper, Tauren Wells, Kari Jobe, Bill & Gloria Gaither aser Carrie Underwood nunger densema lir.

Yakumbo Dove Awards sentong jelia record süa liasü aser taküm iba sentong ya October 19 nü Nashville nung aliba Allen Arena nung agitsü aser October 22 aonung 8:00 ako nungi TBN nung iba sentong yoktsü.

Gospel Music Association Tir aser executive director, Jackie Patillo-i, taoba kum iba sentong agiba indang metetdaksüba den külemi kentenmenü ajanga tamangertem longjemdaktsüba indang lemsatapa liasü.

Taküm iba awards sentong ya "Stronger Together" omen nung ajemdaker agitsü aser iba sentong nung adentsü atema ticket ishika dang ayoktsü.

OLONG PAITEP # 5904

1		2				3		4		5
				6						
	7		8							
9					10			11	12	
			13			14	15			
16					17			18		
			19			20				
21		22								23
24										
							25			

TIPILEN		LANGTSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazung	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. ___ tatsü	- (3)
24. Tenüng kasa jatepba	- (7)	12. Tebur kidong aser zünga kasa tsüngda jatepba	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 5903 TELANGZÜBA

TIPILEN :	LANGTSÜNGLEN :
2. Anükalem, 4. Mesak, 5. Apet,	1. Kümdang, 2. Ayak, 3. Leptep,
9. Meimtep, 11. Posü, 12. Patak,	6. Sati, 7. Yiar, 8. Sangküm, 9. Metsük,
13. Tekettsü.	10. Mazü.



ALOKBA PARTY TASEN KA YANGLUTSÜ SENTONG ATONGER

Alokba : Temba...Asenok külemi longjemer 'Political Party' tasen ka yangludi arung ???

Sobangba : Temba...Surapang asenok Party tasenba ...Party tenungji kechi koda ajatsü ???

Alokba : Party tenungji "BJP/CONGRESS/NDPP/NPF/NPP/INDEPENDENT" ta ajatsü.

Sobangba : Waaa...!!! Tenung ajibo tang aliba Party ajunga lokteper ajaba tenung masü no ???

Alokba : Hau...Nai ashibaji shitak...Party ajak ka küma lokteper ajatsü... Election-i aidang Party ka ticket bener aitsü... Saka adoker külenbo Party ka dang küma lokteptsü.

Sobangba : Temba...Surabangla Party tasenba nükjidong Manifesto-ji kechi ka asütsü ???

Alokba : No.1. Kaziranga Forest/ Resort/ Hotel etc. nung hopta ana-ase/ita junga atsükshia mungtepa Govt. loksatsü sentong atongtepba ...lba yayim (system) to melenshitsü.
No.2. Election nung takok ngur Rulling Govt. nung denra...Küm pungoji marakzüi alitsü...Saka opposition nungbo khenyongi mamentsü Rulling den orr lokteptsü...Asenok Party tasenba nükjidong (Manifesto) -ji aji asü-ja.

Sobangba : Waaamaaa...!!! Temba Party ajibo kecha tashitsüla mali oda kanga jungra-ra aanoo.

- Lilir : L.Kika Pongener.

AO OSHI ANGAZÜKDAK:
TANÜ ANGAZÜKTSÜBA OJANG

Kolen
(adv) kobaleni (which direction ?)
* Asenok **kolen** nungi aru ?

Koleni
(adv) kongi (Where ?)
* Na **koleni** aoer ?



NAI-A YA METETTER MA?

TOTZÜ (PETROL) LANG-LANGA ANGUBA LINÜK KAR

- Venezuela	Rs 1.44 per litre
- Iran	Rs 4.4 per litre
- Angola	Rs 17.7 per litre
- Algeria	Rs 25 per litre.
- Kuwait	Rs 25.1 per litre
- Sudan	Rs 27.4 per litre
- Kazakhstan	Rs 29.65 per litre
- Qatar	Rs 29.82 per litre
- Turkmenistan	Rs 31.74 per litre
- Malaysia	Rs. 36.63 per litre



TANÜBO NAI LANGZÜANG

Q. Koba küm Ministry of Road Transport and Highways tenzük?
A.1945 B.1942 C.1941 D.1940

————— (Taruba adok nung onoki langzüksü)

YASHI ADOK TELANGZÜBA : USA

SUDOKU # 5944 TELANGZUBA # 5943

7	2				6	9	3	4	6	7	8	2	3	1	5	9
8				2							5	1	9	6	4	7
	1	4		6							2	8	3	9	1	5
		7	5	9			8	1			6	5	2	7	9	8
5	8										9	7	8	4	3	1
1				8			2	5	4		1	3	4	5	6	2
2					3				8		7	2	1	3	8	9
		5		2							3	9	6	1	5	4
	9	6	8	1		5		2			8	4	5	2	7	6

OJANG LUTEP # 5489

BUÜRTSAR :

ONGKMAA :

NGNU :

NGDA :

TSALIÜ :

LEBIMRA :

KÜTAM :

NJAJENG :

GLUTYANSÜ :

SATAK :

OJANG LUTEP TELANGZÜBA # 5488

TATSÜ TALANG AJAK SHISADANGER MAPA KÜMA INYAKBAJISA LOKTI ATEMA TAJUNG TIBA

TAN HOPTA ATEMA - KOMA SÜLA ?

Q. ABAM kübok arogotem nung sannükertem ya ABAM-i dang shimer mapang mapang shia, government mapa inyakertem amato, mapang apir arogo balalai transfer and posting yoka tenzükdaksü nunga koma süla ?

Parliament anojungi tembangba anema opposition-i longkak ait



New Delhi, August 12, 2021: Tzüngluruwa mongpu Parliament senden anojungi anenba anema Brihostibarnü opposition party balala nungi lenirtemi longkak aitba noksa nung angur.

New Delhi, August 12 (Agencies): Tzüngluruwa mongpu Parliament senden anojungi tembangba anema Brihostibarnü opposition party balala nungi lenirtemi Vijay Chowk nungi Parliament tashi longkak aita jaja aser aluyimba ozüing tasen asem agienang, ta takhangba agütsü.

Longkak aitba sentong nungji Congress Party lenir, Rahul Gandhi-a aden.

Parliament nung o jembitsü atema sorkari opposition nem temelaba magütsü, ibayongji osangbenertem den jembitsü atema parnok aru, ta pai metetdaksü.

"Parliament nung o jembitsü atema onok (opposition) nem temelaba magütsür, ibayongji nenok (media) den jembitsü

atema onok yagi aruogo. Iba ya democracy tepsetba lir," ta Rahul densema opposition lenirtemi metetdaksü.

Rahul-i, "Parliament senden tembangogo. Parliament senden maliasü, ta nübur shilem 60-ibo bilemer. Linük nung nübur shilem 60 mezüingmeshiogo aser yashi Rajya Sabha nung teka sangshiogo," ta metetdaksü.

"Tang mezüing Parliament telung nung MP tem dak azük. Temalen nungi anüing sentsü uniform agia alirtem anir arua MP tem dak teka sangshidaksü," ta paisa metetdaksü.

Shiv Sena lenir, Sanjay Raut-i, Parliament nung pei tebilemba lemsateptsü atema opposition-i maongka mangu, ta ashiba den

külemi Bodhbarnü Parliament nung tetsür MP tem dak teka sangshiba atema aitsü.

Congress lenir, Shashi Tharoor-i, Centre sorkari Parliament inyakyim shidak mebenshinü aser o melemtepi ozüingtem (Bills) agizük, ta ashi.

"Shidakba agibo coronavirus vaccination, tang linük rongsenkettsüing jenjang, mapa manguba tebilemtsü aser aluyimba ozüingtem atema o lemteptsüla, saka sorkari jena oadok," ta pai ashi.

Bodhbarnep opposition party balala nungi lenirtem Rajya Sabha nung Opposition lenir, Mallikarjun Kharge indang office nung adenshia liasü.

Opposition party temisa Rajya Sabha Chairman, M Venkaiah Naidu-a ajuruogo.

Lok Sabha senden ghonda 21 aser Rajya Sabha ghonda 28 dang amen

New Delhi, August 12 (Agencies): Tzüngluruwa mongpu Parliament nung opposition party temi Pegasus spyware densema onük balala nung o lemteptsü atema takhangba agüja longkak aitba ajanga tan mongpu senden junga magiteti tembangogo.

17buba Lok Sabha senden ghonda 21 ser minute 14 dang amen; shidakba agibo senden ghonda 96 tashi amentsü mapang liasü. Lok Sabha senden tembangtsü ano anogo ana anünga lia Bodhbarnü tembangogo.

Rajya Sabha nunga

opposition-i longkak aitba ajanga senden shilem 28 shi dang amen. Rajya Sabha nunga senden ghonda 97 ser minute 30 amentsü mapng liasü saka ghonda 28 dang amen.

Lok Sabha nung rongrong adokba ajanga ghonda 74 ser minute 46 amajok nung indok aser senden shilem 22 dang agiteta liasü.

Ano külen Bodhbarnü Rajya Sabha nung opposition MP temi timtem agütsüba aser tatalokba balala bushisüingdangtsü atema House Lenir, Piyush Goyal-i special committee ka tentettsü takhangba agütsüogo.

Osangbenertem senden ka nung Lok Sabha Speaker, Om Birla-i, tan mongpu Parliament nung bill 13 benok aser Rajya Sabha nung agizükba bills densema bill ajak senteper 20 agizükogo, ta metetdaksü.

Tan mongpu nung agizükba tongtibang bill rongnung Constitution (One Hundred & Twenty-Seventh Amendment) Bill, 2021, Insolvency & Bankruptcy Code (Amendment) Bill, 2021 aser Appropriation Bills (Supplementary Grants for 2017-18 and 2020-21) densema lir.



August 12, 2021 nü Kinnaur district kübok Nigulsari Reckong-Peoo -Shimla National Highway nung anentsüh aluba sülen NDRF aser ITBP züingsemtemi kümzükba maparen inyakba noksa nung angur.

India nung ano nisung 41,195 dak Covid putet

New Delhi, August 12 (Agencies): India nung ano nisung 41,195 dak coronavirus putetogo aser ibaji densemabotang tashi nung linük nung nisung ajak senteper 3,20,77,706 dak iba tashidak putetogo, ta Brihostibarnep Union Health ministry-i metetdaksü.

Tesüiba ghonda 24 tsüingda India nung coronavirus agi shiranger 490 süogo, aser ibaji densemabotang tashi nung linük nung nisung ajak senteper 4,29,669 jungogo.

Tang hopta shia coronavirus positive putetba shilem 2.23 dang kümogogo aser anogo shia positive putetba shilem-a 1.94 dang kümogogo.

Tang linük nung coronavirus agi teshirangdakpur 3,87,987 dang kümogogo, aser ibaji coronavirus caseload nungi shilem 1.21 dang lir.

Tesüiba ghonda 24 tsüingda coronavirus agi shiranger 39,069 anepogogo aser tang tashi nung shiranger ajak senteper 3,12,60,050 anepogogo.

August 11 tashi nung samples 48,73,70,196 tendangogogo aser iba nungji Bodhbarnü samples 21,24,953 tendangba densema lir, ta Indian Council of Medical Research-i metetdaksü.

Tang tashi nung linük nung coronavirus vaccine dose crore 52.36 tutsüogo.

Yaküm August 7 nü India nung coronavirus case lakh 20 ajung, September 16 nü lakh 50 ajung, October 29 nü lakh 80 ajung aser December 1 nü coronavirus case crore 1 junga liasü.

Taküm May 4 nü linük nung coronavirus case crore 2 ajung aser June 23 nü crore 3 ajung.



August 12, 2021 nü New Delhi nung TMC lenirtem- Derek O'Brien, Saugata Roy aser Yashwant Sinha nungeri osangbenertem den jembiba noksa nung angur.

Advisory council-i mapa nungi anisüngzükba küm atsülangtsü benoker

New Delhi, August 12 (Agencies): Ato kilonser atema Economic Advisory Council-i, health infrastructure tajungba akümba ajanga 'life expectancy' ano maneni taintem ano tenzükba wadang nung mapang talangba alitsü atema mapa nungi anisüngzükba küm atsülangtsütsüla, ta benokogo.

Economic Advisory Council-i sayaba report ka ajanga, mapa nungi anisüngzükba küm ya shilem lemsar atsülangtsütsüla, kechiyong India ya lanur linük ka aser mapa inyaker nütsüing aika aliba linük ka lir, ta metetdaksü.

Council chairman, Bibek Debroy-i sayaba report nung yamai shia lir, "Mapa nungi anisüngzükba küm atsülangtsüba ajanga taintem nem mapa maongka agütsütsü aser ibaji ajanga tang mapa bushirtem atema mapa maongka tsütsü timtem magütsütsü."

Kasa report ajangasa arrshi küm 50 aser 60 temapur nem skill training tanaben agütsütsü atema benoka lir.

"Tanaben skill training agütsütsü atema Central aser state sorkartemi asalentong yanglutsüla. Iba maparen nungji informal sector nung inyaker taintem, yimtsüingtem nung inyakerkem, lisopur minority tem, refugees aser pei ki toktsür tangalen oa aayangertem mesendoktsüla," ta Council report nung shia lir.

Help Age International-i sayaba report ajanga ashiba agi, India nunger nütsüing shilem 10 bo (nisung million 139) shi arrshi küm 60 ser temapurtem lir aser 2050 küm tashi nungbo arrshi küm 60 temapurtemji linük nütsüing shilem 19.5 shi akümtsü, aser iba mapang nungjibo linük senso nisung 5 shia nungi kabo teintet senso asütsü.

Tang India nung teintet senso timba aliba state ji Kerala lir (shilem 12.5), iba sülen Goa (11.20) aser Tamil Nadu (10.4) state tem lir.

South India nung teintet senso timba aliba kuliji fertility rate aser tanur ishiba agiba ajanga lir. Kerala aser Tamil Nadu nung fertility rate 1.7 dang lir.

COVID-19 mechi Australia yimtiba ajungbena shibanger

Canberra, Luroi/August 12 (Agencies): Küm ka dak tema nung COVID-19 case mezüngbuba putetba sülen Australia yimtiba, Canberra ya hopta ka atema ajungbena shibanger.

Iba lockdown ya Brehostibar nikonngang 5:00 ako (par mapang) nungi tenzüksü.

Iba lockdown ya Australian Capital Territory ajunga nung benöksü, kong nisung 400,000 shi alir, kechiaser iba virus menaa alisang ya kolen nungi menar aruar memetet.

Iba tesem nung alirtem ya tongtipang nungdak atema kisüng ki yutsür aotsü melatsü.

Lockdown sangdongba mapang tonga arudang

nüburtem supermarket nung nokdaktepa liasü.

Australia nung kanga kera menatepa aoba Delta variant mazüokteti tim atemer, aser iba mechi linük tulutiba ana - Sydney aser Melbourne - nung lockdown tesashi benoka lir.

New South Wales tesem tuluba lockdown nung lir aser Victoria nunga kasa tenokdangba ya Melbourne nung hopta ka atema benoka lir.

Sydney nung lockdown ozüng shidak amshidaksütsü asoshi mitkar tali jaoktsü akok, ta New South Wales state sorkari ashi.

"Nüngdakba meratem agitsü dak sendakba nung mitkar tashi tali amshitsü," ta state Premier Gladys

Berejiklian-i osangbener senden ka nung ashi.

Sydney tesem kar nung quarantine totuyuba amshitsü asoshi mitkar prangbong maben 580 shi police den yariteper.

Sydney nung lockdown hopta tenet tashi benokaka iba yimti nung COVID-19 tashidak menatepa aoba mazüokteti arur. Brehostibarnü New South Wales nung nisung 345 dak coronavirus putet aser nisung ana süogo.

Australia nübur shilem pezü sadanger shilem ka dang tajemba COVID-19 anema mozü agia lir. Tashidak wara tamajungtiba nungi jenbuaka, tenokdangba balala benokba tejashi nung longkak aitba ajangshia arur.

Ghani tir inyak tashi Taliban-i ken o mejembitsü: PM Khan

Kabul, Luroi/August 12 (Agencies): Ashraf Ghani ya tir ali tashi Afghan sorkar den ken o mejembitsü ta Taliban lenirtemi shiogo, ta Pakistan Ato Kilonser Imran Khan-i Bodhbarnü ashi.

Yimjung ken o jembiba tsütsü terenlok makai anendaka lir aser Afghanistan nung azüdokshi tesashiba akumer, kong telungpur temi kanga kera linük tesem balala agiyonga aor. Taliban teloki anogo 90 nung Kabul ya agitettsü, ta US defence ketdangsür kati Bodhbarnü shia liasü.

Tang tensa nung yimtenren tsütsü tangatetep kati arutsü tasak amai ajiteter, ta Khan-i ashi. "Ita asem pezü tejakdang Taliban lenirtem yaki aruba mapang ni Taliban mesüzüksü merang," ta Khan-i Islamabad nungi bendanger osangbener dang ashi.

"Ashraf Ghani ali tashi onoki Afghan sorkar den jembishinü masütsü ta parnok (Taliban) ashi," ta Khan-i ashi.

Taliban aser Kabul-i shimtetba Afghan ken o jembitem tsüngta taoba küm September ita nungi Afghan yimtenren ken o jembia arur, saka terenlok balaka mali. Taliban teloki Ghani aser par sorkar ya United States indang kazütsü ka amai züngshir.

United States densema linük balala nungi teshimtet nübutem Qatar yimtiba, Doha nung August 31 matongdang ceasefire sangdongtsü asoshi jembishinür. Iba anogo tashinung bendanger sepai ajunga Afghanistan yutsür ainshitsü.

Tang Afghan sorkari United States meyipa arua ano teka amuoktsü asoshi mesüzüksü meranger amai bilemer, ta Pakistan ato kilonseri ashi.

"Parnok yangi küm 20 liasü. Parnok küm 20 alidang meinyakba tang kechi

inyaktsü?" ta pai ashi.

US sepaitemi Afghan sepai busema tayimtsü amshia Taliban den rarar, saka August 31 sülena yamaji yaritsü asü masüar mejangja.

US sepaitem Afghanistan yutsür aoba sülen Pakistan nung America sepai kata amenoka melidaksüner ta jangja-jangja metetdaksüogo, ta Khan-i ashi.

Taliban teloki kanga tongtipang Ghazni yimti agiogo, aser ibai hopta ka majungdang telungpur kabui provincial capital 10 buba aiter alitsü.

Ghazni indang governor aser pa indang deputy iba yimti yutsür ajenba sülen Afghan security forces temi puogo.

Ghazni ya tongtipang Kabul-Kandahar lenmang nung lir, koba agi linük south tsütsü telungpur tashi ita aliba tesemtem den linük yimtiba, Kabul sendakteper.

Ghazni agiba ajanga Taliban teloki Kabul agitsü asoshi tenük tali yoktsü amai angateter.

Linük nung provincial capital 34 nungi shilem asem jungnüa Taliban küboki aitogo.

US aser bendanger sepaitem küm 20 iba linük nung rarar tang iba linük yutsür aoba mapang Taliban teloki arrsanga anogoshi amai alinük tasen agiyonga aor.

Taliban-i yimti tulutiba agiogo aser yimti tezülen police aliba tesem ka dang anünga lir, koba Afghan security forces kübok lir, ta Ghazni nung provincial council züngsem kati osangbener dang ashi.

Bodhbarnü Kandahar yimti nunga kanga sashia raraba osang lir. Taliban-i iba yimti nung aliba tepuokdak tesem agiogo, ta ashir, saka iba osang yabo ano mejangjateti lir.

Linük south tsütsü Helmand province indang yimtiba, Lashkar Gah nung telungpur

temi police headquarters atsüngdokogo.

Taoba ita Afghanistan nung civilian 1,000 dak tema tepsetogo, ta UN ajanga ashir.

Tan hopta northern province nungi nisung meyrirjang aika pei ki yutsür tesem balala nung jenok aser aika Kabul bushia aru. Kabul yimti tezülen khen asoshi tejenokdak tesem yanglua lir aser ano aika yimtung aser osettsüset ayuba ki tejen nung mejanger, ta ashir.

"Chiyongtsü alitsü mesüra ozü tanur nem mozü alitsütsü sen maka," ta Kunduz province nungi jena arur arishi küm 35 tain kati osangbener dang ashi. Kunduz province nung Taliban teloki par kidang mi senlokja liasü.

Bodhbarnü Afghanistan-i mitkar tekolakba, General Wali Mohammad Ahmadzai melenogo, shiba June ita nungi ang iba mapa inyaka arua liasü.

Bodhbarnü sa linük north tsütsü aliba Mazar-i-Sharif yimti-i Tir Ashraf Ghani oa yangji sorkar busemba sepaitem ajungmesoa liasü. Iba yimti ya Taliban telok anemba tesem ka lir.

Mazar-i-Sharif yimti ya Uzbekistan aser Tajikistan arütsü anasa lir, aser iba yimti ya Taliban nem agidaksüra, northern Afghanistan nung sorkar yimli telaor asütsü.

Tir Ghani-i Mazar-i-Sharif nung ethnic Uzbek warlord Abdul Rashid Dostum aser Tajik lenir tejangja Atta Mohammad Noor den iba yimti kumzuka ayutsü asoshi jembishinüa liasü.

Taliban telok north tsütsü aiben aruogo saka parnok teti taolen makai anendak, ta Dostum-i ashi.

Küm aika Ghani-i Afghan National Army tashi itdaksütsü mechi warlords tem senzuka yutsü, saka tangbo pai item teloktem bushir.

MENUNGRA BILEMTETER



Asür Mongjenjungla (Changtongya)
(12.08.2021)

Kodanga amatsü makokba temeim Oja, nai onok toktsür or tanü küm ka ajunger. Na meliaka ne temeim mapa tajungtem teti onok den lir. Tanü iba anogo na bilemteta sarasadema amunger.
~ Temeim Jala, Jabaso, Shirnurtem & Kinungertem.

MULUNGNEN O



ASO :
09.12.1933

ASÜ :
04.08.2021

Onoki teti meima aliba tsürabur Asür R. Lima Walling (Khar) ajungbena iba akümüli wadang tembangba mapang ozü asüku nung temeimer shirnokisa tamang sarasadem, nübo, shisa aser rongsen agi yariogo nenok ajak dangi tsüngdong arua ozü pelaba meshitet nung iba osang ajanga nenok ajak dang ozü kinungertemi kanga pelaba lemsateper.

Tulusang Tsüngremi nenok taküm aser kibongtem talubosa moajangma ta ozü sarasadem.

Temeim kinungertem.

Nisung 16 mener helicopter ka Russia nung tsükok

Moscow, Luroi/August 12 (Agencies): Tesem balala repranga jajar timba sür nisung 16 mena aliba helicopter ka peninsula nung tsükok, nisung tenet samar bushir, ta yangji aliba sorkari ashi.

Mi-8 helicopter ya Kronotsky nature reserve nung aliba Lake Kuril nung tsük, ta Brehostbarnü sangdong ka ajanga ashi.

Helicopter ya Lake Kuril telung nung meter 100 (feet 328) shi lur lir, aser iba awatsüng ya meter 316 (feet 1,037) shi tarok aser tasazük square kilometer 77 (30 square mile) lir.

Iba tayimtsü nung ketdangsür asem aser passenger 13 liasü, ta ashi.

Lendong atalokba tesemi tekumzüküker aser tzüshir nisung 40 yokogo. Kamchatka ya Moscow nungi anüdoklen kilometer 6,000 (mila 3,728) shi pilar lir.

Iba lendong nungi nisung tuko kumzüküko, ta yangji aliba health ministry osang ka ajanga ashi.

"Nisung tuko nguogo, parnok ajak takum lir. Nisung bushiba maparen maneni inyaker," ta osang ajanga ashi.

Tanüngba nisung tenet indang tia mejangjateti lir.

Air safety rules nung aibelenba atema bushisingdang tenzüküko, ta Russia Investigation Committee ajanga ashi, shirnoki tayimtsü lendong

ajuruba bushisingdang.

Raliwalir tem ya kechi linük nungi'ar shia mali saka parnok ya timba Moscow aser St Petersburg nungi lir, ta ashi.

Iba tayimtsü tsükokba tesem yagi helicopter nung dang oteter aser yangji tzüsü kanga sashia aliba ajanga teyari maparen junga meinyakteter, ta osang ajanga ashi.

Vityaz-Aero helicopter nungya raliwalir tem anir Khodutka tesemi aorba liasü. Khodutka ya Petropavlovsk-Kamchatsky yimti anasa volcano ka lir.

Vityaz-Aero ya tesadang ka Igor Redkin meyong lir, shiba shishilembar millionaire aser Kamchatka regional legislature nung züngsem lir. Jana indokba tesem nung nisung ka osettsüset bushia aliba mapang Redkin-i khasetba sülen hopta tetenzüklen pa kidang pua ayu. Redkin-i iba nisungba ya shirem den aitep, ta ashi.

Kamchatka ya alinükbo tuluka aser yangji nisung kanga aikabo malir, saka yangji volcano aser alima tebour ajungba ajanga raliwalir temi teti semdang.

Kamchatka nung July ita Antonov An-26 twin-engined turboprop tsükokba lendong nung iba tayimtsü nung mena alir nisung 28 prong asü.

Russia nung tayimtsü lendong ya akhi mapang nungi ajurua arur, saka 2000s mapang nungi tajungba kuma renloka lir.

Pungro nung cutting & tailoring institute lapoktsüogo



Pungro, Luroi/August 12, 2021: Rest House Ward, Pungro kübok Cutting & Tailoring Training Institute lapokba sentong nung ADC Pungro, Abhinav Shivam, IAS -i telok den jembiba noksa nungi angur.

Pungro, Luroi/August 12, 2021 (TYO): "TO EMPOWER OUR SPECIAL WOMEN" omen kübok, Bresthostibarnü Rest House Ward, Pungro nung ADC Pungro, Abhinav

Shivam, IAS -i Cutting & tailoring training institute ka lapoktsüogo.

Iba sentong nung EAC Pungro, Nuhta Tunyi, NCS-i okila jembiba. Iba sülen, Executive Chairman, YTC,

Makezho aser President, Public Forum, Pungro, V.Kongsu nati o jembiba liasü.

Iba sentong nung tailoring instructor, Luntsula menden liasü, ta sangdong ajanga metetdaksü.

Peren nung PHED ajanga maparen balala inyak

Peren, Luroi/August 12, 2021 (TYO): Aruya aliba Independence Day (Azadi Ka Amrit Mahotsav) anogomung nungtem nung PHED, Peren ajanga July 1 nungi tenzüka district telungtet nung maparen aser sentong balala inyaka/achaayanga arudar, ta sangdong ajanga metetdaksü.

"Azadi Ka Amrit Mahotsav" tenzüka, July 02, 2021 nü Department-i New Peren kübok Water Treatment Plant nung merükmejuba (cleanliness drive) aser süngdong atemba ayonga agiogo.

Iba sülen, July 13, 2021 nü Swachhagrahis aser WATSAN Committee züngsemtem atema Department-i 'ODF Plus' - capacity building nung webinar ka ayongzüka liasü. Ano July 18,

2021 WATSAN züngsemtem aser Swachhagrahis ajanga FTK amshiba yimya aser JJM IMIS registration nung webinar ayonga agia.

Iba webinar agiba mapang, video ka ajanga Department ajanga yangluba Field Testing Kit (FTK) amshiba yimyatam sayu aser district kübok yimtsüngtem nung WATSAN Committee aser Swachhagrahis nem iba kit lema agütsü.

July 28 nungi August 02, 2021 tashi Ndunglwa, Punglwa, Samziuram aser Gaili yimtsüngtem nung tzübo aser tzü aolen (drainage) merüktetta (Swachhata Shramdham) liasü.

Participatory Rural Appraisal (PRA) ajanga August 4 nungi 8, 2021 tashi district kübok yimtsüng balala nung Jal Jeevan

Mission mapatong kübok awareness campaign ayongzüik.

August 10 nungi tenzüka yimtsüng tem nung 'ODF Plus sustenance exercise' achaayanga agia arudar, kong Individual Household Latrines (IHHL) reprangshimtsü aser ki ka danga mezüdoki iba maparen inyaksü Department tebilemba lir. Iba maparen August 14, 2021 tashi inyaksü.

Merükmejua alitsü aser tzü temerük ajemtsü indang nübur dang osang sangoktsütsü nükjidong yur Department-i iba sentong ayongzüik. Iba sentong takok ngua agitettsüsa amalitepa inyakba aser shilem tajung agiba atema, department-i yimertem dang pelaba metetdaksü, ta sangdong nung shia lir.

Longleng nung Health Camp ayongzüksü

Longleng, Luroi/August 12, 2021 (TYO): 75buba Indian Independence Day 2021 anogomung nungtem nung, District Administration, Beti Bachao Beti Padhao (BBBP) aser Mahila Shakti Kendra (MSK) den Health & Family Welfare Department, Longleng

longjemer August 14, 2021 nü tetsü aser tetsür tanur atema Free Health Camp den 'Healthy Baby Show Competition' ayongzüksü. Sentong anaprongla Local Ground, Longleng nung agitsü.

Independence Day sentong agiba mapang tanga inyakyim

talisa Nagaland nung adokba/ yangluba product tem ajungkettsütsü atema BBBP Stall lapoktsü aser Car Poster Campaign ayongzüksü. Anungji, tetsü aser tanur tetsür ajak dang iba maongka tajung agitsü asoshi mepishir, ta sangdong ajanga metetdaksü.

Wokha nung Road Safety Campaign agiogo



Wokha, Luroi/August 12, 2021: Road Safety Campaign agiba mapang, helmet meinoki motorcycle nung senzür ka nem District Transport Department aser Traffic Police temi helmet agütsüba yangi noksa nung angur.

Wokha, Luroi/August 12, 2021 (TYO): India nüjiso ngur küm 75 ajungba nungtem nung, Bresthostibarnü (12.08.2021) Wokha Town kübok District Road Safety Committee,

Wokha ajanga Road safety campaign ka ayonga agiogo, ta sangdong ajanga metetdaksü. District Transport

Department aser Traffic Police, Wokha longjemer iba sentong

agiogo. Helmet asema tajangzüik dak sendakba nung tekümdangtsü osang sangoktsütsü asoshi, iba Road Safety Campaign agiba mapang, helmet meinoki motorcycle nung senzür tem nem helmet angati lema agütsü.

Iba den külemi aibelener (helmet meinoki motorcycle nung senzür) tem dang tekümdangtsü agütsü aser tarutsü nung helmet meinoki motorcycle aniba putetra temerenshi tulu agütsütsü ta parnoki aibelener dang tetuyuba agüja liasü.

Maneni, kasa campaign nung team-i senzüsebonger nem 'road safety awareness' indang pamphlet aser leaflet tem lema agütsü. Iba den külemi, Poster Campaign agia liasü, ta sangdong nung shia lir.



OFFICE OF THE
CHANGTONGYA SENSO TELONGJEM DIMAPUR

DIMAPUR : NAGALAND

Motto : Telongjem Aser Teyaritep

Ref. No CSTD/Gen/2020-2023,13

Date 12th Aug 2021

PELABA LEMSATEPER

Shri. Imokaba Jamir IRS, deputation nung Commissioner & Secretary, Planning and Coordination Government of Nagaland shimba atema Changtongya Senso Telongjem Dimapur aser Dimapur Changtongyatsür Telongjem ajanga tenüngsang agütsür. Changtongya senso ka nem iba maongka tulu agütsüba asoshi Shri Neiphio Rio-i aniba PDA sorkar danga pelaba shisemer.

Onokisa **Shri. Nükshitemjen Longkumer-i** Asst. Director, Directorate of School Education menden ngutetba atema pa nem tenüngsang agütsür.

Wadang tasen nung ajemoka inyakdang Tsüngremi nenoki inyakba maparen ajak nung len ania moajang, ta onoki sarasademtsür.

**Sd/-
President
Changtongya Senso
Telongjem Dimapur**

**Sd/-
President
Dimapur Changtongyatsur
Telongjem**

TENÜNGSANG AGÜTSÜR

Ungma Imlang Imsongunger IMTISOSANG SEMCHIR-i teküboklen agüja aliba jabaso aser jala ajanga pei wadang aser maparen balala nung takok tulu ngua kinunger nem konang tetushi tulu bener arutsü nung kinungeri tena nem tenüngsang tulu agütsür.

- 1. Wb. Imsongmeren Imsong** S/o Mr. Repatemsü Imsong & Mrs. Rongsenlila Jamir, pai Asst. Plant Production Officer, under staff selection commission (SSC) 2019 Government of India jenjang ngutet.
- 2. Wt. C. Nukshilemla** D/o Mr. M. Chuba Ao & Yashipokla Lkr, lai Doctor of Philosophy (Ph.d) Kalinga University, Raipur nungi on the thesis: "A COMPARATIVE STUDY ON THE PSYCHOLOGICAL FACTORS & MOTIVATION LEVELS THAT INFLUENCE JOB SATISFACTION OF POST GRADUATE TEACHERS IN GOVERNMENT & PRIVATE SCHOOLS IN NAGALAND" jenjang ngutet.

Tsüngremi nena taküm aser maparen ajak nung maneni len ania moajangma ta kinunger sarasadem.

Kinunger tenüng nung ;

- 1. Alemtoshi Imsong, Tatar**
- 2. Aliangshi Imsong, Tatar**
- 3. Temjenchuba Imsong, G.B**
- 4. Mangyangnuken Imsong, Tatar**

Noklak District Administration-i teintet rogo semdang



Noklak, Luroi/August 12, 2021: District Administration-i Noklak jila nung alir teintet rogo semdanga aser parnok nem sempet agütsüba yangi noksa nung angur.

Noklak, Luroi/August 12, 2021 (TYO): 75buba Indian Independence Day nungtem nung, Hombar aser Mongolbar anogo (August 9 aser 10, 2021) District Administration Noklak-i Noklak jila nung alir teintet rogo semdang.

Noklak jila telungtet nung alir teintet rogo pur nem akhüm agütsüba temaitsü sayua, iba jila

nung alir teintet rogo 131, shirnok arishi küm 75 tema lir, parnok nem District Administration-i sempet agüja liasü, ta EAC HQ, Kathyinla, officer in-charge-i metetdaksü.

Iba maparen atema ward balala nung tekolakpurtemi District Administration yaria liasü, ta sangdong ajanga metetdaksü.

Wokha nung Flag Rally ayongzüik

Wokha, Luroi/August 12, 2021 (TYO): District Youth Resources & Sports Office, NSS aser NYKS Wokha District den District Administration longjemer Bresthostibarnü (12.08.2021) Deputy Commissioner, Wokha Orenthung Lotha-i iba Flag

Rally tenzüka liasü. Police point-PWD lemjem nungi iba rally tenzüik aser daily market ajanga senzür police point nung tembang. Iba Flag Rally nung nisung 45 agi shilem agia liasü. 75buba India Independence Day nungtem nung iba rally ayongzüik, ta sangdong ajanga metetdaksü.

Neeraj Chopra world no. 2 kumogo Kerala Sorkar dang pelar: PR Sreejesh



New Delhi, Luroi/August 12, 2021 (Agencies): World Athletics Men's Javelin Rankings nung, India nunger Javelin star, Neeraj Chopra-i world no.2 jenjang ajangzuktetogo. Tesusa sangdongba Men's Javelin Rankings nung Neeraj-i jenjang 14 tashi ajangeta iba alizung tongteta liasü.

Taoba hopta tembangba Tokyo Olympics nung Neeraj shilem magidang pa jenjang 16buba nung liasü, saka arishi küm 23 tain Neeraj-i iba asayamung nung gold medal anguba sülen, nungtugu asayar (Javelin) aika ajateta pai world no. 2 tongteter asütsü.

Tokyo Games nung Neeraj-i Men's Javelin - gold medal anguba den 'Indian track & field' saisapong tsütsü iba alizung tongteter India nunger athlete rongnung pa mezüing aküm. Iba tetoktepa final nung, Neeraj-i metre 87.58 shi yokteta temaba jenjang ajangzuktet, koba 2000 Sydney Olympics nungi iba asaya nung tajungtiba shilem agia gold medal angur rongnung

Neeraj athlete pezübuba asütsü. World Athletics Men's Javelin Rankings nung tanabuba jenjang tongtetsü asoshi Neeraj-i point 1315 shi nguteta liasü. Iba ranking nung Germany nunger Johannes Vetter sülenbo Neeraj asütsü. Taküm Vetter-i tenetben tashi metre 90 dak tema yokteta asayaba sülen, pai point 1396 anguba yong World no. 1 tongtet.

Ajisüaka, Tokyo Olympics nung Vetter-i Neeraj Chopra den menepete asayatsü maangka magu. Germany nunger javelin asayar takotet Vetter-i gold medal angutsü ta ajaki imlaa ata, saka tebur javelin final tetoktepa nung pai metre 82.52 dang yokteta jenjang 9buba nung tembang.

Kasa ranking nung Poland nunger Marcin Krukowski-i jenjang 3buba; Tokyo Olympic silver medal angur Yakub Vadlejh aser Germany nunger Julian Weber nunger top 5 nung lir.

*World Athletics Men's Javelin Rankings.

1. Johannes Vetter - 1396 points

2. Neeraj Chopra - 1315 points
3. Marcin Krukowski - 1302 points
4. Yakub Vadlejh - 1298 points
5. Julian Weber - 1291 points

Tokyo nung 'India Today' den jembiba mapang, Neeraj Chopra-i, tenung tajung angutsü aser ranking nung temaba jenjang atutsü bilema meliasü. Tanga kecha mebilemi, Tokyo Olympics final nung tajungtiba asayatsü temulungtetba tulu yur shilem agiba yong iba jenjang ajangzuktet, ta ashi.

"Ni gold angutsü bilema meliasü saka otia dang jembidi süra, Olympic nung asaya takok ngura ranking temabai atutsü asoshi kangarabo tebilemetsü makar. Asaya anogo/mapang, nü dak temulungtetba aser bendanga agütsüba dak tuluka keta lir aser iba tebilemba nung ni akang akanga nokdaka lir, ta Neeraj-i ashi.

Tokyo asayamung tebur javelin final nung World No. 1 Vetter tamakok anguba indang jembiba mapang, Neeraj-i ashiba agi, iba asaya nung Vetter-i tajungba (Neeraj-i yokba 87.58m dang nungi timba) asaya asübo, nia pa ajatetsü asoshi renemer liasü.

"Pai (Vetter) junga asaya yongjia, nia marendaki dang kü shilem tajungtiba nung inyaksü bilema asaya liasü. Tanungba tetokteper dang nungi pai tajungba asaya asübo, pa ajateta asayatsü asoshi ni tajungtiba yoktsü renemer ata," ta Neeraj-i ashi.



New Delhi, Luroi/August 12, 2021 (Agencies): Tokyo Olympics nung India tebur Sorkari goal keeper PR Sreejesh nem senpet agütsütsü osang sangdongba atema, Brehostibarnü pai Kerala Sorkar dang pelaba lemsatet.

Sreejesh, shiba Indian hockey wadang nung asayar tongti ka lir, pai ashiba agi, Olympic nung shilem agirtem jangjateta aser mesendokba ajanga tarutsü nung lanur aikati hockey saisapong nung temulung agütsütsü asoshi ajungmesotsü.

Kerala sorkari PR Sreejesh nem senpet cr. 2 agütsütsü nangzükogo. Küm 41 tashi yonga arur sülen taküm Tokyo Games nung bronze medal takok angur India tebur hockey team nungi Sreejesh asayaago. Kerala CM Pinarayi Vijayan-i, Olympic nung shilem agir ajak, shirnokisa Tokyo 2020 nung State nungi India tenung nung asayaago, item asayar shai nem senpet lakh pungongo agütsütsü, ta ashi.

Public Education Department nung Deputy Director (Sports) menden nung alisang, PR Sreejesh ya Joint Director mendeni ajungkettsütsü.

"Kü nem iba maangka agütsüba atema CM Vijayan dang kanga pelar. Nenoki (Kerala Sorkar) iba ama mapa tajung inyakba ajanga tarutsü nung lanur aikati saisapong talisa hockey nung shilem agitsü asoshi ajungmesotsü," ta Sreejesh-i ashi.

Taoba mapang Olympic nung shilem agir Anju Bobby George-i Kerala Sorkar aitsüba sülen, State Sorkari senpet agütsütsü asoshi osang sangdonga liasü. Anju-i ashiba

agi, Olympic medal ka indang jenjangi jangjatsüla.

"Kerala Sorkari pa (Sreejesh) nem senpet agütsütsü osang magütsü. Athlete temi medal anguba mapang aser parnok pei pei state tonga arur sülen, State sorkar aikati athlete nem senpet agütsütsü sangdong. Ajisüaka, Sreejesh state tonga aruba sülen, Kerala Sorkari pa nem senpet agütsütsü osang kecha magütsü," ta Anju-i ashi.

"Olympic medal ka indang jenjangi asenoki angatetsüla," ta laisa ashi.

Ano, tan hopta tetenzüklen Dubai nung alir entrepreneur, Dr. Shamsheer Vayalil, shiba VPS healthcare indang Chairman aser managing director lir, pai-a Sreejesh nem senpet cr. 1 agütsütsü sangdongogo.

Tokyo Olympics nung, India tebur hockey team nung tongti shilem agir asayar rongnung PR Sreejesh ka liasü. Hockey saisapong tsütsü goalkeeper Sreejesh ya asayar tajung ka ama ajaki zungshir. Iba asayamung nung India hockey team-i asaya akokba den Sreejesh-i tanga team indang tongtibang goal aika nokdangteta asayaago. Pai bendanga agüja shilem agiba yong, küm 49 nung India tebur hockey team-i mezüing semifinal tongtet.

Bronze medal play-off nunga India-i Germany team madak takok angutsü atema Sreejesh-i kanga junga asaya liasü. Germany in the match at Tokyo Olympics. Iba asaya nung Germany-i penalty corner 13 angu, saka Sreejesh jeretpera asayaba ajanga Germany-i item PC nungi goal ka dang inoktsütet. Ano, asaya tatem tashi Sreejesh-i tasüita asaya aser Germany pur goal ka nokdangtetba yong, India-i goal 5-4 agi iba asaya koktet.

Nagaland Adventure Club-i sentong ka ayongzük

Dimapur, Luroi/August 12, 2021 (TYO): Nagaland Adventure Club aser Assam Rifles longjemer, Hokolbarnü (07.08.2021) cycle expedition sentong ka Dimapur nung ayonga agiogo. India nüjiso ngur küm 75buba ajungba benjongmung dak sendakba nung iba sentong ayongzüka liasü, ta sangdong ka ajanga metetdaksü.

Dimapur kübok Kachari Ruins tesem nung iba expedition tenzük aser cycling ajanga temang anema alibaren tsütsü tekümdangtsü osang sangoktsütsü; aser meimchir

tsüingda kati ka asoshi aria bilemetsüba tanela lidaktsütsü asoshi iba cycle expedition ayongzük.

President & Secretary Nagaland GB Association aser Dimapur Assam Rifles ajanga iba sentong tenzükja liasü. Kilometer 74 shi ayimjema agiba expedition sentong nung shilem agirtemi Dimapur-Medziphema-Molvum-Moava-Punglwa-Gaili-Ngalwa-Heinekongla tesemtem ajanga senzü aser Jalukie nung tembang.

Cyclist temi parnok sempet aser tasa sayutsü mechi sabang

agütsüba atema President aser Nagaland Adventure club zungsemtemi Assam Rifles dang pelaba metetdaksü.

Iba expedition sentong takok ngua agitsü asoshi Assam Rifles ajanga maparen ajak abensaa achayangtsüogo, ta kasa sangdong nung shia lir. Tarutsü nunga, sentong balala nung Assam Rifles den maneni amalitepa inyaksü asoshi imlaa atar ta Nagaland Adventure Club-i lemsatet.

Iba sentong nung tetsür cyclist ana densema cyclist 31 agi shilem agiogo, ta sangdong ajanga metetdaksü.



Mokokchung, Luroi/August 12, 2021: India nüjiso ngur küm 75 ajungba nungtem nung, District Sports & Youth Resources, Mokokchung ajanga Brehostibarnü (12.08.2021) rally ka ayonga agiba noksa nung angur. Iba rally nung District Administration aser DSO & YTO nungi ketdangsurtem den Fazl Ali College aser Jubilee Memorial College, Mokokchung nungi kaketshirtemi shilem agiogo.

BILEMDANGANG

"Tsüngremer sayatenya ajanga alimaji metetloka aor."